

永
定
河
志

永定河志目錄

卷十四

奏議五

乾隆四年
至八年

永定河志卷十四

奏議五

乾隆四年正月二十七日大學士鄂爾泰會同工部為遵

旨會議事該臣等會議得直隸總督孫嘉淦等奏稱永定河事宜前經大學士鄂爾泰等議於南岸之寺臺金門閘郭家務北岸之張客各建石壩一座挑濬引河以分其勢於半截河以下改挑新河一道

部議覆准其金門閘石壩已經建立郭家務業經

奏准改建草壩又臣顧琮奏請將寺臺建壩處所

移於曹家務改建草壩北岸張容石壩亦請移於

求賢地方改建草壩其半截河地方建設分水草

壩一座面寬二十丈統以六分過水又經臣訥親

臣孫嘉淦合詞條奏於南岸金門閘上下多建草

壩使南洩之水常多水小仍歸引河水大聽其漫

流於田經部議覆今臣孫嘉淦與臣顧琮會同覆

加細勘務期等及久遠一勞永逸臣等謹會同詳
查虛衷酌議除寺臺之壩移於曹家務張容之壩
移於求賢及半截河建設草壩各款意俱相同應
仍照原議外至金門閘上下建築洩水之處覆加
確勘金門閘石壩原議八分過水但一年之內八
分以上之水亦不多有臣等悉心商酌請於金門
閘之下長安城地方添建草壩一座面寬二十丈
以四分過水分流南下水小則草壩分洩水大則

石壩一並減流其草壩引河不必另挑即濬歸金
門閘引河之中至郭家務壩面俱係素土應築灰
土檻一道以資抵禦以上添建草壩疏濬引河並
隔淀坦坡隄埝等項應需工料俟確核料估另疏
分案具題再南北兩岸建設多壩非旦夕可以告
竣請於南岸郭家務以下七工冰窖地方各量開
旱口一處用埽裹頭以洩凌麥二汛之水至上汛
各工既經多建草壩水勢有所分洩則下汛七八

等工均可無庸修築並半截河以下引河隄埝等
工亦當量為減省統俟各壩建成引河疏就之後
再將引河經由地方城池村落應行護衛之處詳
細酌議築隄保固等因具奏前來查乾隆三年十
月內經兵部尚書今陞吏部尚書果毅公訥親吏
部尚書今授直隸總督孫嘉淦等奏稱永定河衝
決之患實因築隄而起再四詳度莫若因勢利導
現今南岸之金門北岸之張容皆建閘挑河已有

成議請將張客之閘不必石工但建草壩在於兩岸相度地勢開建草壩金門閘上下多建數壩北岸少建使南洩之水常多水小仍歸引河水大聽其浸流數年之後草壩朽壞舊河之水恣改而南即沿河居民皆知漫流於田之水無足為患等因摺奏經大學士九卿議以永定河之水若能因勢利導使水盡歸南行誠為不治而治之上策但故道久成旗民廬舍一時勢難更復覆令總督孫嘉

淦會同總河顧琮復加細勘會詞具題去後今據
孫嘉淦等奏稱覆加確勘金門閘石壩原議八分
過水但一年之內八分以上之水亦不多有志心
商酌請於金門閘之下長安城地方添建草壩一
座以四分過水分流南下水小則草壩分洩水大
則石壩一並減流至郭家務壩面俱係素土應築
灰土檻一道以資抵禦再南北兩岸建設多壩非
旦夕可以告竣請於南岸郭家務以下七工水害

地方各量開旱口一處用埽裹頭以洩凌麥二汛之水至上汛各工既經多建草壩水勢有所分洩則下汛七八等工均可無庸修築並半截河以下引河隄埝等工亦當量為減省統俟各壩建成引河疏就之後再將引河經由地方城池村落應行護衛之處詳細酌議築隄保護等語查永定河形上游低於下口河身高於地面故道固應議復而批濟務宜相機今該督孫嘉淦等既稱郭家務石

壩改建草壩寺臺之石壩移於曹家務改建草壩
其張容之石壩亦請改建草壩之處會同總督顧
琮詳查各款俱意見相同應仍照原議等語均毋
庸議外至奏稱金門閘石壩原議八分過水但一
年之內八分以上之水亦不多有請於金門閘之
下長安城地方添建草壩一座以四分過水水小
則草壩分洩水大則石壩一並減流其草壩引河
不必另挑即濬歸金門閘引河之中等語查建壩

分流原議隨地形之高下視水勢之大小因勢利
導順流宣洩方無衝溢之虞今既據稱一年之內
八分以上之水亦不多有酌擬添建草壩以四分
過水不必另挑引河即濬歸金門閘引河之中亦
屬隨地制宜之法其郭家務壩面該督等既經勘
明係素土難資抵禦均應如所奏准其於長安城
地方添建草壩一座郭家務加築灰土檻一道其
所需工料並疏濬引河以及隔淀坦坡隄埝各工

仍令該總河等一並確估分案具題又奏稱建設
多壩非旦夕可以告竣請於冰窖地方各量開旱
口一處等語查凌汛轉瞬即至草壩即難速竣令
於下七工冰窖地方量開旱口用埽裹頭以洩凌
麥二汛之水是亦先事預防之計但汛水漲發之
時水勢作何歸宿有無妨碍民舍田廬之處奏內
並未議及應令該督等酌量妥協辦理至上汛各
工該督等既稱多建草壩則下汛七八等工均可

毋庸修築半截河以下引河堤埝亦當量為減省
應令該總河等因時因地詳慎籌畫務期永慶安
瀾俟各工告竣之後將一切引河經由地方城池
村落應行築堤保護民生之處詳酌妥議請

旨遵行可也謹

奏奉

硃批依議欽此

乾隆四年六月初五日工部為遵

旨議奏事臣等議得直隸河道總督顧琮等疏稱據署
永定河道六格詳稱查曹家務建築分水草壩一
座其出水一帶俱係卑窪鹹地渾水一過則成膏
壤但清水無歸恐致積滯今勘得曹家務以下由
郭家務小梁村等處計長四十餘里向有遙河雖
因年久淤塞尚有河形間段疏濬使渾水淤地清
水歸淀實屬有益應挑引河共長一千七百丈該
銀一千八百六十三兩二錢九分五釐等情臣一

面在於要工銀內撥動一面給咨委負赴部請領以還原款理合具題等因前來查先據該督將永定河曹家務等處草壩工程估需銀五萬九千八百二十六兩九錢二分一釐零造冊具題臣部於本年四月內覆准在案今該督等疏稱曹家務建築分水草壩一座其出水一帶俱係卑窪鹹地渾水一過則成膏壤但清水無歸恐致積滂今勘得曹家務以下由郭家務小梁村等處計長四十餘

里向有遙河雖因年久淤塞尚有河形間段疏濬
使渾水淤地清水歸淀實屬有益應批引河長一
千七百丈該銀一千八百六十三兩二錢九分五
釐在於要工銀內動撥一面給咨委員赴部請領
還款等語應如所題行令該督等在於要工銀內
先行動支銀一千八百六十三兩二錢九分五釐
給發承挑各員作速募夫上緊挑挖通順毋致淤
塞工完將用過銀兩照例據實造冊具題查核再

查前項估需銀兩業經該督等咨報委員前赴戶部請領在案應俟該委員領回之日照數歸還原款可也謹

題奉

旨依議欽此

乾隆四年六月初十日工部為遵

旨議奏事臣等議得直隸河道總督顧琮等疏稱永定河金門閘壩工應挑引河自出水護壩排椿外起

至韓家營北由常家等庄至長安城又與長安城
草壩引河合流若兩壩水勢僅一引河宣洩誠恐
汛發浩瀚難以容納今酌量兩股分流其西股自
小楊青務接牝牛河西岸起至南窪入中亭河東
股自小楊青務由牝牛河至楊青口入津水窪庶
伏秋汛漲得以容納暢流實有裨益以上金門閘
石壩暨長安城草壩應挑引河工程共需銀四萬
八千六百三十六兩六錢三分零又修築堤埝以

資捍禦建築草壩以分水勢並設立木橋利濟行
旅建設涵洞隨時啟閉均屬有益之工並需銀三
千三百七十七兩一錢九分八釐通共該銀五萬
二千一十三兩八錢二分八釐零造冊具題至高
橋村西建設涵洞處所係南岸六工汛負蔡學頤
應管堤工請即令該管汛負就近專司管理隨時
啟閉再查凌麥二汛之水已經題准在南岸郭家
務以下七工冰窖地方各量開旱口以資宣洩其

引河經由各村庄遍行曉示除斥鹵不毛並大田
未種之處及時挑挖外其麥苗已長之田俟麥黃
刈護之時即多僱人夫星飛挑挖庶良苗無傷而
要工不致貽悞相應具題等因前來查先據直隸
總督孫嘉淦等奏請於金門閘之下長安城地方
添建草壩分流南下其草壩引河不必另挑即濬
歸金門閘引河之中至郭家務壩面俱係素土應
築灰土檻一道以資抵禦以上添建草壩疏濬引

河並隔淀坦坡隄埝等項應需工料俟確核料估另疏分案具題再南北兩岸建設多壩非旦夕可以告竣請於南岸郭家務以下七工冰窖地方各量開旱口一處用埽裹頭以洩凌麥二汛之水等因於本年正月內經大學士鄂爾泰會同臣部覆令將疏濬引河等工確估分案具題並令將冰窖地方量開旱口之處令該督等酌量妥協辦理在案令該督等疏稱金門閘石壩暨長安城草壩應

批引河工程共需銀四萬八千六百三十六兩六錢三分零又修築堤埝以資捍禦建築草壩以分水勢設立木橋以濟行旅建設涵洞隨時啟閉均屬有益之工共需銀三千三百七十七兩一錢九分八釐造冊具題至高橋村西建設涵洞處所係南岸六工汛負蔡學頤應管堤工請令該管汛負就近專司管理隨時啟閉再凌麥二汛之水已經題准在於南岸郭家務以下七工冰窖地方各量

開旱口以資宣洩其引河經由各村庄遍行曉示
除斥鹵不毛並大田未種之處及時挑挖外其麥
苗已長之田俟麥苗刈護之時即多募人夫星飛

挑挖等語臣部查前項工程估需銀五萬二千一

十三兩八錢二分八釐零業據該督等咨報委負

前赴戶部請領在案今該督等將築堤挑河建壩
並建涵洞各工造冊題估前來應令該督等動支
銀兩給發經管各員作速上緊趨築如式堅固其

應批引河經由地方建設涵洞隨時啟閉均應責令經營各員加謹辦理毋致貽悞俟工完之日將用過工料銀兩照例造冊具題查核可也謹

題奉

旨依議欽此

乾隆五年二月直隸河道總督臣顧琮為

奏明事竊查永定河下游之范甕口鄭家樓葛漁城一帶地勢窪下歷年積水汪洋常年不消上年凌

汎水由鄭家樓東殘廢民埝缺口流出入沙家淀
匯鳳河達津歸海臣於本年二月二十五日前往
永定河下口率同永定河道六格逐細履看今歲
凌汎已過水勢平穩凡應築堤工應疏河道即令
該道六格相度機宜督令該管廳縣等實心辦理
惟是鄭家樓一帶低窪地畝渾水經由漸得受淤
可望種收之利但其平地漫流漸往西北將來恐
有礙及田廬自當先事籌畫以保萬全臣同該道

六格悉心斟酌議於北岸堤頭接建草壩約百餘丈靠壩殘缺民搶令河兵力作修補完竣以禦其西漫之勢下口一帶照例動項挑濬深通使其東注第下口疏濬惟有額設挑河土方價銀並無估料開銷之例若再請添設實屬繁費查下口向有河灘產葦官地四十餘頃從前收數不過五六萬觔自專負經理以後每年所收數倍於前俱分貯各工以為歲修之用於估銷冊內據實聲明造報

上年霜降後該道六格選委妥負細心查收較前
更多今議建草壩可以動撥此項官葦應用則錢
糧即可節省臣一面知會臣孫嘉淦高酌辦理謹
將臣查看永定河下口及凌汛平穩緣由一併恭
摺

奏明伏乞

皇上睿鑒訓示施行謹

奏奉

殊批妥協辦理欽此

乾隆五年四月二十九日工部為請

奏要工以資保障事臣等議得直隸河道總督顧琮等疏稱永定河石景山汛內龐村戲臺南並小屯以及天將廟後舊片石土隄等工係頂冲險要現在陡立懸崖若不急為修整難資捍禦應行修砌以資穩固通共估需工料銀九千七百八十七兩三錢四分四釐零並聲明此項工程關係緊要若

俟部覆到日請

帑興工恐致延悞一面咨撥戶

部錢糧及時購料修築庶於河防有益等因具題

前來查永定河石景山汛內龐村戲臺南等處舊

片石土堤各工該督既稱係屬頂冲險要急宜修

築應如所題准其領銀給發承修之員作速辦料

募夫如式砌築以資捍禦再查前項工程應需銀

九千七百八十七兩三錢四分四釐零先據該督

因該工關係緊要給咨委負請領業經臣部於本

年五月初七日移咨戶部撥給在案相應行令該督俟完工之日將做過工段丈尺並用過料物夫工銀兩照例造冊題銷查核可也謹

奏奉

旨依議欽此

乾隆五年九月初四日大學士九卿等會議得直隸總督孫嘉淦等奏稱查得永定之水扶擁沙泥從前散流於固安霸州之野泥留田間而清水歸

淀間有漫淹不為大害自築堤束水以來始有潰
淤之患雖歲糜帑金訖無成效乾隆二年大學

士鄂爾泰等勘明於金門閘建石壩一座下挑引

河即係永定河之故道惜其壩身太高不能過水

乾隆三年臣與訥親合辭具奏請於金門閘之上

下再建草壩務令過水以為漸復故道之計荷蒙

聖恩俞允臣隨於河臣顧琮相度於金門閘下長安城

地方建草壩一座乾隆四年春閘告成壩身又失

於高是以上游不能過水而下口改流於鄭家樓
等處洩水河臣顧琮與臣高酌下口既已宣暢則
上游放水似可暫緩乃去秋今秋兩汛經過而下
口地方仍有未妥是以臣前面奏親往查勘今勘
得下口河流自鄭家樓逆折而北歷龍河鳳河雅
拔河之下游清水俱有壅滯且去北運河不遠倘
再冲泛恐礙運道所關匪細若欲築堤挑水改使
南行不惟地已於高工費浩繁且仍係東淀下游

其淤墊可所底止去年冬間臣與顧琮曾奏請於
葉淀之東挑河引水使入西沽之北今勘得入口
之處逼近運河居民稠密渾水經流終非長策則
是下口之道窮而無所復入必於上游放水始為
經久之圖河臣顧琮面定會商意見相同是以臣
由天津返棹觀看金門閘之引河有東西二段自
畢家庄分流東股歷牛坨蒲塔等處由津水窪入
淀渠身深通但所歷村庄頗多水勢不能寬展其

西股河道俱行曠野之中不與村莊相近下口入
中亭河一百餘里之內止有王莽店一處逼近河
岸其中亭河入淀之處止有苑家口蘇家橋等處
村莊尚須保護中亭及玉帶河南堤尚須加鑲其
餘並無妨礙村莊城垣之處河身寬大兩岸開展
詢之土人僉云此係永定河之故道觀其形勢實
足以容納全河之水應於兩股分流之處將東股
之口築高數尺遇異漲之水則無入東股以資消

減尋常汎水專走西股可保無虞因至金門閘再
行相度見石壩之上不過數十丈即係河流頂冲
之所於此處開一土壩不必草裹石鑲但令掘展
寬深則全河之水頃刻可過一出隄口即入金門
閘之引河可以順流暢達現今河水甚小斷無冲
淹將來汎水漲發散入田野民收肥腴之利經流
歸槽安行故道並無潰決之憂即使間有漫溢不
過一二村莊較之潰隄淤淀之害不及十分之一

即使保護村莊不過零星疏築較之歲修搶修之費亦不及十分之一再此金門開之引河即係大學士鄂爾泰議開之河其現今開堤之處緊接金門開石壩之上與訥親與臣原奏相符皆係已成之議並非新有更張總而計之下游已無可行之路上游現有天然之河開隄放水則費小而害輕築隄束水則費大而害重熟思審處止有此策更無二計臣謹與河臣顧琮合詞具奏伏乞

皇上聖斷施行再欲開隄放水則日期不可遲延今年
河水本小目前霜降已屆水涸流細放之使出可
以操縱由人不致為患距明歲汎水之期尚遠使
水與河相習民與水相安臣等因其所至之處細
加相度陸續奏明預為保護庶可萬全再過半月
即係立冬冰凌漸至宣洩不暢若今秋不放遲至
明年凌汎麥汎秋汎接踵而至為日迫促草率開
隄恐有疏虞屈指計算不可再緩臣謹擇九月初

七日興工將引河之內整理通順出口之處挑挖
疏引於九月十六日開隄放水屆期臣與河臣顧
琮親至其所相度開放再此案原係臣與訥親會
奏之事仰懇

聖恩於十六日放水之期可否仍令訥親前來與臣等
會勘情形共同開放並會商善後事宜其於公務
更有裨益合並聲明等因具奏前來查乾隆二年
八月間大學士臣鄂爾泰奉

命親往詳勘永定河水勢情形擬於半截河隄北改挖
新河於南北兩岸建滾水石壩四座各開引河於
南岸金門閣建壩八十丈以渾河故道接牝牛河
者為引河開濬寬深等因經總理事務王大臣會
同臣等議准在案續於乾隆三年十月內據尚書
果毅公訥親直隸總督孫嘉淦奏請將張容之閘
不必石土但建草壩再於南岸金門閣上下多建
草壩北岸少建使南洩之水常多等因經臣等議

以永定河之水若能因勢利導使水盡歸南行誠
為不治而治之上策覆令督臣會同河臣覆加細
勘具題再議嗣經總督孫嘉淦等覆加確看金門
閘石壩原議八分過水但一年之內八分以上之
水亦不多有悉心高酌請於金門閘之下長安城
地方添建草壩一座以四分過水分流南下等因
經大學士鄂爾泰會同工部議准亦在案今據直
隸總督孫嘉淦等奏稱勘得從前奏請於金門閘

下長安城地方建築草壩又失於高不能過水今
查金門閘石壩之上數十丈以河流頂沖之所此
處開一土壩不必草裹石鑲但令掘展寬深則全
河之水頃刻可過金門閘之引河可以順流暢達
等語查永定河歸復故道屢經勘議因形勢遽難
更改是以中止而下游經水之處已多淤塞即令
行疏築終非經久之計故原議於上游添設草壩
因勢洩水使盡歸南行但全河之水悉行開放雖

係歸復故道而更改之初所宜倍加詳慎前經該督會同河臣奏請於金門閘之下長安城地方建築草壩四分過水分流南下因壩身仍高不能過水而河臣顧琮又以下口改移於鄭家樓等處洩水高令上游暫緩放水亦屬河臣慎重經理之意今該督奏稱親往查勘下口河流自鄭家樓逆折而北歷龍河鳳河雅拔河之下游清水俱有壅滯且去北運河不遠恐礙運道所關匪細若欲築隄

挑河改使南行不惟地已淤高工費浩繁且係東
淀下游其淤墊何所底止則是下口道窮而無所
復入必於上游放水始為經久之圖河臣顧琮面
訂會商意見相同等語是下游水道已經該督親
身查勘實無宣洩善策請乘目前霜降水涸流細
之時於金門閘之上開隄放水以為漸復故道之
計將來汎水漲發散入田野民收肥腴之利經流
歸槽安行故道並無潰決之虞查大學士鄂爾泰

等議覆原案永定歸河故道必須相度全河形勢
遍歷上下河干方可籌畫盡善為垂久之策今既
據該督等通身籌算相度機宜就金門開現成引
河乘時放水並稱可以操縱由人不致為患該督
身任地方目擊情形且與河臣等會商意見相同
自應照所奏令其詳慎辦理又該督奏稱金門開
之引河有東西二股東股歷牛坨蒲塔等處渠身
深通但所歷村莊頗多水勢不能寬展其西股河

道俱行曠野之中不與村莊相近止有王莽店苑
家口蘇家橋等數處尚須保護再於東西兩股分
流之處將東股之口築高數尺遇異漲之水則兼
入東股以資消減尋常汎水專走西股可保無虞
等語查河水開放導由引河西股水道行走既可
容納又不與村莊相近自應照所請辦理所有水
道必由之村莊民舍墳墓應令飭地方官預為加
意防護無致淹漫至東股水道所歷村莊既多自

應於分流之處築壩擱水雖據該督疏稱遇異漲之水始行分洩但永定水性靡常倘於汎漲之時西股下流稍有壅滯以致橫溢旁注或東股水入轉多而附近之村莊民舍未經預為防護淹漫為患亦未可定應令督河二臣一并飭所屬官員先事預防務使雖遇異漲之年而民無不備之虞方為妥協至中亭玉帶等河加以永定河水匯注增流其南隄應行加鑲之處應令該督會同河臣詳

加勘估加鑲保固再該督奏請此案原係臣與訥
親會奏之事仰懇

聖恩於九月十六日放水之期可否仍令訥親前來與
臣等會勘情形同開放並會商善後事宜等語
查河水開放雖在臨時審度然必須平日深悉水
勢情形始能有合機宜至善後事宜亦似非暫時
即能定議但既據該督奏請前來應否令尚書公
訥親前往之處伏候

聖裁謹

奏奉

硃批依議速行訥親不必前往其兩次建壩皆失於高
乃顧琮與河員不能奉行盡善之咎着該督查叅欽
此

乾隆五年九月十八日軍機大臣奉

上諭直隸河道關係緊要總督孫嘉淦總河顧琮現在
辦理江南河道總督高斌久任河工素稱諳練原欲

侯其陞見來京差令前往會同高酌今思高斌進京
取道直隸若就便會同該督等詳悉相度確酌定議
來京面奏更為妥便著即傳旨與高斌並將前後各
案件抄錄寄去高斌從何處接到諭旨即從何處前
往並令該部傳諭孫嘉淦顧琮等欽此臣高斌遵

旨進京

陞見於本月二十一日行至雄縣接奉到

諭旨隨欽遵自雄縣至趙北口十方院取道保定縣二

十三日至霸州會同臣孫嘉淦察勘永定河之西引河下口水會中亭河處二十四日會勘東引河下口津水窪入東淀處即沿東引河迤上至牛坨村會同臣顧琮於二十五日會勘蘇家橋南東西兩引河分流處二十六日會勘金門閘以上放水之處勘畢臣等欽遵

聖訓公同詳悉講求再三商酌臣等會議得永定河歷年既久下口屢經淤壅亟應改移於固安城南霸

州城北以順東趨之勢而引河兩岸不設隄防汛
水長發則任其出槽平鋪散漫溜勢既散則不致
為害地方而低田更可收淤肥之利其霸州城郭
圍築護隄近河村落加築土埝雖大水之年均可
保護無虞此實以不治為治之上策也臣等詳察
情形將來伏秋水漲之時散漫無溜不慮濁水湍
悍及秋汛消退水落歸槽則須聽其自行成河其
由東引河入淀或由西引河入河均未可定臣等

詳求熟慮以為西入中亭河會西淀白溝諸水由
玉帶河轉而東趨實不若於固南霸北之間順流
東下由津水窪接連東隄直達西沽入海尾閘寬
濶通暢順利則上游漲水消退自易此實天然最
順之形勢也臣等擬於明年麥汛以前先令由西
引河入河則偏西一帶窪下城地或過漫水即可
得淤於今冬明春半年之內限期寬展將東引河
再加修理通順其中間近河村莊易於遷徙者預

為遷徙可以防護者築埝防護又霸州城郭應築
護城圍隄又自鋪疙疸以西起至寧家口接連上
六工隄止應築橫隄一道約長二十餘里以護城
郭莊村至鋪疙疸以西地勢微窪所有古埝應行
粘補保護州北村莊俱於麥沉以前修理完備於
麥熟收穫以後再將東引河河頭開放並將津水
窪高橋以南民埝開通以資宣暢再將西引河暫
行堵塞俾全河盡赴東趨於順其自然之中寓因

勢利導之意俟秋汛過後河勢已定再察情形隨
宜辦理至金門閘放水之處此時全溜出口舊河
已經斷流且可不必堵塞新河之口且用草裹頭
不必遽令寬展倘遇伏秋盛漲舊河宣洩其大半
可以無慮俟數年之後如果新河順軌安瀾著有
成效再將舊河截斷不用再查保定縣地迤西千
里長隄自新莊迤北天字號起至城東路疇村止
玉帶河河溜逼近堤根最為險要應加寬厚其路

曠迤東至艾頭村接連營田圍埝約長五十餘里
臣孫嘉淦臣顧琮現在議估加築月隄一道以作
重層保障臣等勘得該處玉帶河形勢即永定河
水不由西下其西淀白溝諸水至此收束太緊亦
應修理保護以資捍禦以上事宜臣等公同悉心
詳議合詞會

奏恭請

聖訓指示遵行謹

奏奉

硃批大學士九卿詳議具奏河道總督高斌亦著與議
欽此

乾隆五年九月大學士九卿等為詳議具

奏事該臣等會議得江南河道總督高斌等奏稱永
定河歷年既久下口屢經淤壅亟應改移於固安
城南霸州城北以順其南趨之勢而引河兩岸不
設隄防汛水長發則任其出槽平漫溜勢既散則

不致為害地方而低田更可收淤肥之利其霸州城郭圍築護隄近河村落加築土埝雖大水之年均可保護無虞此實以不治為治之上策也臣等詳籌熟慮以為西入中亭河會西淀白溝諸水由玉帶河轉而東趨實不若於因南霸北之間順流東下由津水窪接連東淀直達西沽入海尾閘寬濶通暢順利則上游漲水消退自易此實天然最順形勢臣等擬於明春麥汛以前先令水由西引

河入河則偏西一帶窪下鹹地或遇漫水即可得
淤於今冬明春半年之內限期寬展將東引河再
加修理通順其中間近河村莊易於遷徙者預為
遷徙可以防護者築隄防護又霸州城郭應築護
城圍隄又自鋪疍疍以西起至寧家口接連上六
工隄止應築橫隄一道約長二十餘里以護城郭
村莊至鋪疍疍以西地勢淤窪所有古埕應行粘
補保護州北村莊俱於麥汛以前修理完備於麥

熟後再將東引河河頭開放並將津水窪高橋以南民埝開通以資宣暢再將西張河暫行堵閉俾全河盡赴東趨俟秋汛過後河勢已定再察情形隨宜辦理至金門開放水之處此時大溜出口舊河已經斷流且可不必堵塞新河之口現且用草裹頭不必遽令展寬倘遇伏秋汛漲盛舊河宣洩其大寺可以無虞俟數年之後如果新河順軌安濶著有成效再將舊河截斷不用再查保定縣城

迤西千里長隄自新莊迤北天字號起至城東路
疇村止玉帶河河溜逼近隄根最為險要應加寬
厚其路疇迤東至艾頭村接連營田園塿約長五
十餘里臣孫嘉淦顧琮現在議估加築月隄一道
以作重層保障臣等勘得該處玉帶河形勢即永
定河水不由西下其西淀白溝諸水至此收束太
緊亦應修理保護以資捍禦以上事宜臣等公同
悉心詳議合詞會奏等因前來查先於乾隆二年

八月內大學士臣鄂爾泰奉

命親往詳勘永定河水勢情形擬於南岸金門閘建壩
八十丈以渾河故道接牝牛河者為引河開寬濬
深循其故道於下游合流皆得逆注爭流俾推蕩
泥沙而東去酌改開濬事宜等因摺奏經總理事
務王大臣會同臣等議准在案續於本年九月初
一日直隸總督孫嘉淦奏稱永定河之水扶擁泥
沙從前散流於固安霸州之野泥留田間而清水

歸淀間有漫溢不為大害自築隄束水以來始有
潰隄淤墊之患歲糜帑金訖無成效臣親勘金
門閘之引河有東西兩股係永定河之故道觀其
形勢實足以容納全河之水應於二股分流之處
將東股之口築高數尺遇異漲之水則兼入東股
以資消滅尋常汎水專走西股可保無虞再金門
閘以上開一土壩不必草裹石鑲但令掘展寬深
則全河之水頃刻可過一出隄口即入引河可以

順流暢達與河臣顧琮合詞具奏等因經臣等議
覆均應照所請行今該督等詳慎辦理在案又於
九月十八日欽奉

諭旨令江南河道總督高斌前往會同總督孫嘉淦等
詳悉相度確酌定議經工部行文欽遵去後今據
河道總督高斌等公同會勘情形將永定河善後
事宜酌議應濬應築修理保護之處覆奏前來查
永定河之金門閘以上既經開閘放水順軌安流

毫無阻礙其挖河引水歸淀入海經由處所應濬
應築之處該督等公同查勘形勢將應辦事宜詳
悉會議應如所奏行令該督等於明年麥汎以前
先行引水由西引河入河由河漸次入海又於今
冬明春將東引河修理通順其霸州城郭村莊等
處最為受水衝要之區應令先行築隄並粘補古
埝加意防範保護城廬務於麥汎以前趨辦完備
於麥熟後計加相度熟籌地形將東引河河頭開

放並將高橋以南民埝一并開通以資宣暢至稱
西引河暫將堵閉俾全河盡赴東趨之處但恐值
水漲之時衆水滙流東注直下水勢洶湧於固南
霸北一帶近河村莊不無淹漫之患不可不預為
防護今該督等既稱應遷徙者遷徙應防護者防
護自應詳慎辦理酌量納費務期人民遷徙樂業
勿致流離失所再於秋汛過後詳勘河道情形循
順水勢務籌萬全以垂永久至稱金門開放水之

處舊河已經斷流不必堵塞新河之口且用草裹頭不必遽令展寬倘遇汛漲仍令宣洩之處是亦慎重河防圖維善後之意亦應令該督等俟新河水勢如果順軌安瀾著有成效再將舊河截斷不用至所奏保定縣迤西千里長隄玉帶河河溜逼近隄根應加寬厚並路疇迤東艾頭村等處應加築越隄一道該督等既稱現在估議均應准其加築作重層保障以禦險要再玉帶河形勢該督等

既經勘明西淀白溝諸水至此收束太緊應須修
理保護應令該督等務於玉帶河水匯之區詳加
籌畫加意防範勿致潰決俾水勢順流入海方為
經久奠安之計以上東西兩引河應行開濬應行
建築修補以及保定西淀白溝諸河等處加幫修
理各工應令該督等酌量工程緩急分別先後次
第興修確估造報工部具題查核可也謹

奏奉

旨依議欽此

乾隆五年直隸總督臣孫嘉淦

奏為永定河已歸故道事查永定河歸復故道一案

臣前奏明於本月初七日興工十六日放水臣隨委効力員外郎秦嶠會同永定河道六格等督率河員如期修濬臣於十一日自保定起程十三日至金門閘河臣顧琮已到工所會同於金門閘之上開挖重隄二十丈挑濬河槽二百七十餘丈使

入金門閘引河之內其金門閘引河東西二股現將東股閉塞令其專走西股其西股之中尚有淺窄之處相度閘挑自楊青務起至李各莊止展寬挑深共三千六百餘丈每日用夫至二三千名詢之居人耆老僉云渾水散漫不過數寸尺餘一日二日即涸而所過田畝皆成膏腴從前過水之時間有漫淹不為大害官紳士民詢謀僉同百姓子來踴躍趨事於十五日各工俱竣於十六日辰時

開放河水頃刻之間全河已過順軌安流毫無阻礙兩岸居民沿河聚觀並無驚惶之時亦無阻撓之議除善後事宜容臣與河臣詳勘妥議另行具奏外所有全河已過民不驚擾情形理合先行奏

聞謹

奏奉

硃批永定應歸故道朕已慮之久矣今孫嘉淦一力擔承妥協辦理實屬可嘉俟一切善後事宜詳勘妥辦

永定河志卷十四
明年伏秋兩汛果保安瀾著該部議叙具奏至善後
之計最為緊要該督與河道總督顧琮從長妥議具
奏至永定既歸故道此後河道總督應否尚設之處
亦著一併詳議具奏欽此

大學士伯鄂爾泰等

奏為會勘永定河水道事乾隆六年二月三十日大
學士九卿等會議得大學士伯鄂爾泰奏稱該臣
等自盧溝橋至新開隄口循引河查看中亭玉帶

及東西兩淀由舊河下口一帶赴天津將勘過河道各形情與督河二臣會商所有定議辦理緣由謹分晰為我

皇上陳之查舊河五工以下至七八工逐漸淤高約至丈餘三角淀雖歲有疏濬仍復淤平水無去路由鄭家樓北迤折而東勢既不順且會入鳳河離運道已近應改由上游故道從引河放水不設隄防俾漸復其舊但水性遷徙靡定導之散漫必先防

奔注籌其歸宿通核全局以期有備無患督臣孫
嘉淦遽請開隄放水實係經理未善所有新開隄
口應即行堵築俾漫水早消播種無悞並為將來
施工之地已經臣鄂爾泰臣訥親具奏請

旨遵行切念改河之初不得不以引河為之約束現在
河流淺狹又經淤塞應再加開挖寬深使麥汎凌
汎之水河身可以容納至伏秋大汎然後順其漫
渙則附近民田仍可收一麥之利待至數年之後

村莊應移應護已有定局民情亦漸與水勢相習
再為隨宜辦理用力自易但引河過水不免淤墊
批濬珠費工力查有琉璃拒馬牝牛等水滙為一
河在引河西北地勢頗順應酌量開河一道將琉
璃等河河水導入引河上游令其衝刷泥沙並於
河頭並建壩閘以資啟閉如是則引河全無淤墊
下游歸入玉帶中亭並無留滯惟是中亭過於淺
狹應酌為開濬深通臣等現查凌汛由中亭玉帶

入口之處清渾相蕩可稱安順復乘舟查看東西各淀其中淤高淤涸之處甚多應於淀內相度開挖引河或與大河相並開成二道三道每歲設法疏濬則清水去路宣通既可減洩盛漲渾水經由亦可資其蕩刷至渾水過玉帶東經淀河仍可刷沙而行但恐淀河不能容納之水將沙泛入淀池止水之內日積月累至有墊佔俱不可不預思經理之法應添設犁船之類歲加疏濬不令淤積為

害再引河下游接近南窪與柴伏淀僅隔一線民
捨每歲清水盛漲即泛入南窪若不大為隄防即
有透淀之慮應於此處詳加相度築堅實長隄一
道以截趨下之勢其玉帶河長隄應築寬厚自路
曠東至艾頭村接連營田圍埝約長至五十餘里
加築月隄一道以作重層保障已據江南總督高
斌等會勘奉

旨准行在案毋庸再議至舊河身應仍留分洩異漲即

由現在下口出水如此辦理完備周密再將各村莊詳加查看應遷移者遷移應保護者保護然後開隄放水自不致有妨害再原議令水由東股引河達津水窪將高橋以南民搶開通以資宣洩查津水窪上接黃家河以蓄固南積水若渾流經此則積水無歸今另議開濬引河又有舊河分減水勢應毋庸再行開通以上改移各事宜據河臣顧琮議稱永定所以為患者總以渾水淤淀下游不

能暢達之故雖名為改復故道實係導水於兩淀之間若引河淺狹則有漫淹之患寬深則有淤淀之虞今由引河導入玉帶雖清流可以刷渾不致淤塞但下游修歸於淀一入止水漸積必淤東淀既淤則勢如扼吭將來玉帶河亦必因之而淤並西淀白溝諸水無路達津深為可慮等語查渾流歸入玉帶清水推刷不致淤塞河臣與臣等所見相同玉帶以東雖係經由淀河渾沙不免泛入淀

池而淀河之內則斷不能停滯淀河既暢則玉帶
何由復淤况淀池之內已議設法疏濬人力可施
豈能為害倘循河工舊習挖淺不力則積久之下
實不能保其無虞河臣顧琮則以為淀河淤高尚
可疏濬淀池若淤則人力必無所施又顧琮議稱
改歸故道無隄無岸一遇伏秋大汛溢出之水四
漫橫流奔騰就下則必自刷一河湍行奪溜等語
查引河不設隄岸河身復淺則有溢漫奪溜之患

今將河槽開深如遇漫溢其勢本緩豈致奪溜即使奪溜亦與隄岸迫束橫決為患者輕重不同河臣顧琮則以為漫溢之水橫流趨下勢必奪溜當其衝者為害與隄岸潰決相等又顧琮議稱欽惟世宗憲皇帝諭旨令渾河別由一道毋使入淀誠可為探本清源一言而舉其要凡治渾河莫能遠越等語查從前河流固霸之間渾水直入淀內以致柴伙勝劣等淀多有墊溢今議有引河導入玉帶清流

其漫溢之水則泥留田間清水歸入河淀又於舊河分減水勢與從前全河注淀不同是於

世宗憲皇帝諭旨實無違越河臣顧琮則以為渾水過玉帶河以東若穿入淀內積久必淤貽害匪輕萬不可行夫渾河水道原因下口無久善之策是以有歸復故道之舉今據河臣顧琮議稱永定河之病在於下游河唇淤高水難速下應將五工以下之河唇挑挖如舊其挑河之土加培兩隄仍將半截

河之下大隄挑斷數百丈另挑河道仿前總河靳輔之法挑川字河至韓家樹之東入大清河即以挑河之土作拉沙洩湖塹再將郭家務之下大隄挑斷百餘丈導水於隅淀坦坡塹之北入引河以資宣洩再鄭家樓疏濬支河一道於葛漁城東與北股合流蓋渾水上游與中段兩河溜不並行若下口則支河愈多分洩愈暢再查京南一帶瀝水槩由龍鳳等河合流入大清河清渾合流水勢浩

大難以容納應俟葛漁城北埵之外起至鳳河之
龐家莊止另挑一河引雅拔河龍河之水入鳳河
則北來漚水歸宿有區即以挑河之土培築北埵
於鳳河下游之龐家莊起另挑一河至西沽之西
入清河使其分流以減水勢再於上游兩岸縷隄
之外增築遙隄與舊有遙月隄相接既可以為重
層保障又可放淤勻沙其所築遙月隄必須酌高
於縷隄數尺以防異漲於凌伏二汛酌量放淤令

其高於河唇即異漲漫過縷隄而月隄之內地既
高於河唇隄又高於縷隄足資捍禦又有減水各
壩以減水勢下口通暢上游無阻河唇不致淤高
如此經理既可治其暴漲又無淤淀之患五工以
下亦免復淤之病庶為萬全之計等因臣等查舊
河下游即使并挑豈能永無淤墊使異漲不致壅
遏但顧琮身任河務既稱五工以下可以挑挖如
舊不致復淤下游通暢上游無阻自必確有所見

從此渾水循軌安流更無淤淀之患豈不甚善且
開河放水各工程非二三年不能完畢以目下水
道情形而論此二三年中即照顧琮所議試行亦
不為害如將來果屬通順又何必多用工費另事
周章仍屬無益而淤塞之情形復露再為改由新
河亦不遲悞蓋各工內如原議將玉帶長隄加培
高厚路疇村迤東加築月隄五十里又如臣等所
議開濬東西淀河等項無論水道由何處行走俱

係應行之事應先儘此次工程辦理若應改從上游水道即將開挑引河於南岸築隄等事續為妥辦以成前議等因又直隸總督孫嘉淦奏稱臣至金門開放口之處見上游兩隄內河水滿槽新河兩岸漫出之水甚少蓋因漲水日夜不息將河中自刷寬深現今大溜水面寬至七八十丈四五十丈不等船走中泓篙不到底其水甚深是以漫溢較少自金門開至蘇家橋五十餘里情形大約相

同自蘇家橋以下於畢家莊史各莊等處漫水漫出趨入東引河滿槽直瀉現今成分流之勢將來水落之時歸東歸西尚未可定其東引河下流又分兩股一股入牝牛河仍歸中亭一股由黃家河歸津水窪因係三河分流是以並未冲潰兩岸村莊毫無浸損四野農民安堵無恙復查凌汛之後接發異漲之水較之秋汛更大乃從來未有之事而新河下流村莊人民並無損傷則新河之足容

全汛即可預知而將來辦理亦易為力再近河村莊從前凌汛漫出之水已經消退因二月初四日重復漫溢是以現今尚未全涸臣查水已涸乾之處現在行犁佈種其春麥當培收護似可毋容畝免錢糧其現今尚未全涸之處未免播種稍遲自當查明豁免以廣

皇仁臣現飭該地方官履畝親查將頃畝錢糧花名細數脩造清冊分送大學士鄂爾泰尚書公訥親查

核候核有定數再行具題合并聲明等因各具奏
前來查本年正月十八日軍機大臣奉

上諭永定河工關係重大著大學士伯鄂爾泰尚書公
訥親乘驛前往會同總督孫嘉淦總河顧琮悉心查
勘欽此欽遵在案又奉

上諭昨因永定河放水經理未善以致固安良鄉新城
涿州雄縣霸州各境內村莊地畝多有被淹之處難
以耕種且居民遷移不無困苦朕與孫嘉淦不能辭

其責也用是寤寐難安深為軫念著大學士鄂爾泰
尚書訥親會同總督孫嘉淦詳細查明被水處所應
免錢糧若干速行奏請豁免先將此旨曉諭百姓知
之欽此欽遵亦在案經大學士伯鄂爾泰等會同確
勘將金門關上游新開隄口之處請

旨堵築遵行今大學士伯鄂爾泰等查勘全河形勢通
盤酌議將應行開濬應加修防之處分晰覆奏前
來臣等伏思自古治水之法惟有疏濬決排以順

水性第從前野曠人稀可以順其瀾漫今則野無曠土人烟稠密勢有不得不為之隄防者况永定河水性尤湍悍擁泥扶沙易決易淤是必悉心計議熟籌萬全乃得經久今大學士伯鄂爾泰等議於金門開之新引河西北酌量開河一道導引入河上游令其衝刷泥沙使之全無淤墊歸入玉帶中亭二河又於淀內相度開挖引河每歲設法疏濬則清水去路宣通既可減洩盛漲渾水經由亦

可資其蕩刷至渾水過玉帶東經淀河恐淀河不能容納將沙泛入淀池致有淤墊應添設犁船歲加疏濬不令淤積為害再於引河下游築堅實長隄一道以截趨下之勢其玉帶河長隄應加寬厚以及路疇村迤東加築月隄一道以作重層保障仍留舊河身以資分洩異漲再將各村名詳加查勘應遷移者遷移應保護者保護然後開隄放水自不致有妨害至東引河津水窪高橋民埝原議

開通今已議開濬引河無庸再行開通等語又奏
稱河臣顧琮議永定河之病在於下游河唇淤高
水難速下應將五工以下之河唇挑挖如舊仍將
半截河之下大隄挑斷數百丈另挑河道即以挑
河之土作拉沙洩湖埝再將郭家務之下大隄挑
斷百餘丈導水入引河以資宣洩又於鄭家樓等
處或疏濬支河或另挑引河會入大清河以分水
勢再於上游兩岸縷隄之外增築遙隄加幫月隄

以為重層保障其所築遙隄必高於縷隄數尺以
防異漲又有減水各壩以分水勢則下口通暢上
游無阻河唇不致淤高如此經理既可治其暴漲
又無於淀之患五工以下可以免復淤之病庶為
萬全之計等語臣等詳查大學士伯鄂爾泰等所
奏舊河五工以下至七八工逐漸淤高約至丈餘
水無去路若由郭家樓等處引水自北而東勢既
不順且會入鳳河離運道已近因欲改由上游故

道從引河放水不設隄防漸復故道而河臣顧琮
又以為改歸故道無隄無岸一遇伏秋大汛散漫
橫流必有漫溢奪溜之患又恐渾水經淀泥沙淤
入淀池而諸水無路達津深為可慮意見各殊臣
等伏思永定一河水性靡常最易淤阻惟在因勢
利導修治得宜下流暢通上游無阻俾渾流不致
淤滯而居民得以安堵方屬妥協今大學士伯鄂
爾泰等既奏稱顧琮身任河務以為五工以下可

以挑挖如舊不致復淤下游通暢上游無阻自必
確有所見從此渾水盡歸安流更無淤淀之患豈
不甚善且開河放水各工非二三年不能完畢以
目下水道情形而論此二三年中則照顧琮所議
試行亦不為害如將來果屬通順又何必多用工
費另事周章倘仍無異再為改由新河亦不遲悞
等語應如太學士伯鄂爾泰等所奏照依該總河
所議行令將五工以下河唇淤高處挑挖如舊使

水順行無阻並將丰截河等處大隄及支河各工如式挑濬導水會流入河以資宣暢並於上游縷隄之外增築遙月等隄作重層保障放淤勻沙以防汎漲但查總河顧琮議稱渾水過玉帶河以東若穿入淀內積久必淤今若照該總河自五工以下另開支河引入大清河以達西沽不復更由東淀誠恐沙泥盡入運河以入三汊河並淤海口且大清河相距運道不遠一當伏汎大水時行永定

全河之水直注大清河萬一不能容納潰入運河
致礙運道關係重大應令該總河顧琮再行詳悉
確查籌畫萬全如果下游疏通不致淤塞泛溢有
碍運道即將應批應濬河道並應行幫築隄工逐
一分晰造具確冊具題查核其玉帶河長隄加高
培厚路疇村以東加築月隄並開濬東西兩淀河
等項大學士伯鄂爾泰等既稱無論水道由河處
行走俱係應行之事先行儘此項工程辦理等語

亦應如所奏行令該總河一并確估具題查核又直隸總督孫嘉淦奏稱金門閘至蘇家橋以下等處漫水趨入東引河以成分流之勢其東引河下流又分兩股因係三河分流是以并無衝潰兩岸村莊毫無侵損農民安堵再新開隄口應速行堵築之處業經遵照星夜備料興工移咨河臣速行辦理近河村莊從前凌汛漫出之水已經消退因二月初四日重複漫溢是以現今尚未全涸臣查

水已乾涸之處現在行犁佈種似可毋庸豁免錢糧其現在未經全涸之處未免播種稍遲自當查明豁免以廣

皇仁臣現飭各地方官履畝親查將頃畝錢糧花名細數備查清冊俟有定數再行具題等語查永定新引河放水處經由地方多有被淹之處上厓

聖懷特遣大臣親往查勘仰見

皇上睿慮周詳軫恤民間之至意今該督既以漫水係

三河分流並無衝潰村莊其新開隄口業已備料
堵閉並移咨河臣速行辦理之處詳悉奏明應毋
庸置議至奏稱水已乾涸之處現在行犁佈種毋
庸豁免錢糧其現在尚未全涸處所未免播種稍
遲應當豁免錢糧等語查該督雖稱已涸之處已
經佈種春麥當倍收穫但上年秋麥業被水淹籽
粒人工已屬虛費應行該督將各處被水村莊委
員一併詳加確勘分別輕重欽遵

諭旨將應免錢糧酌量細數據實查明造冊題報戶部核議並將現在未涸積水務使速行消涸不致民業荒廢流離失所可也謹

題奉

旨依議欽此

乾隆六年三月二十一日大學士鄂爾泰戶部尚書訥親等會議得直隸河道總督顧琮奏稱大學士九卿慮及自五工以下另開支河引入大清河

以達西沽仍恐泥沙盡入運河以入三汊河並淤海口且大清河相距運道不遠一當伏汛大水時行永定全河之水直注大清河萬一不能容納潰入運河致碍運道關係甚大令臣再行詳細確查籌畫萬全臣查大清河乃京南諸河及東西兩淀會流達津之尾閘寬濶深通實足容納北運河亦係溢流並非止水正可助大清河以刷渾更無潰入運河致碍運道之虞至於三汊河以及海口乃

百川朝宗之總滙又非大清河可比自元明以來
從無淤墊自濁漳入運由三汭河歸海其泥沙倍
於永定且流之已數十年而三汭河及海口並未
見少有淤墊之處此其明驗等因一摺於本年三
月十四日奉

硃批大學士鄂爾泰尚書訥親會同該部議奏欽此又
顧琮奏為永定河挑河築隄等事五摺一請自半
截河以下趙家樓改挑子母河一道至西蕭家莊

又自西蕭家莊起挑川字河自陳家嘴起挑川字
左河自二光村起挑川字右河俱歸至大清河並
於兩岸作勻沙歧圓頂岡隄等工一請自五工以
下至七工趙家樓改河隄口共長四十六里趕挑
河唇並子母河槽等工一請自葛漁城北埵起至
鳳河之龐家莊止另挑一河引雅拔河龍河之水
入鳳河使北來滙水歸宿有區再於鳳河下游之
龐家莊起另挑一河至西沽之西入大清河使分

流以減水勢及沿河堆隄並建涵洞等工一請加築遙月等隄除北岸之頭工北張家南岸五工曹家務二處月隄業經奏明趕辦外尚有南岸頭工高嶺應築連絡月隄一道又南岸二工北蔡舊有月隄應行加幫並接築隔隄以備放淤又北岸二工趙村渡口應加築月隄一道又北岸求賢莊至胡林莊應加築月隄一道又南岸曹家務至冰窖應加築遙隄一道計長四十里併將冰窖老河西

隄酌量開通再冰窖以下舊有隔淀坦坡埝至洞
子門止今應自洞子門接築坦坡埝至青光計長
八里等工一請加築路疇村迤東月隄一道共長
五十餘里其開濬東西淀河工程容俟逐細確查
另行辦理等因俱於本年三月十六日奉

硃批大學士鄂爾泰尚書訥親會同該部議奏欽此續
又據顧琮奏稱永定河下口川字河等工關係緊
要而西蕭家莊以下入大清河工程乃汎水歸宿

去路有關緊要目今下口西蕭家莊以下雖有河水通行之處只可容納春水不能宣洩伏秋汛漲下游一有梗阻則上游難保無虞况今年凌汛甚早麥汛恐在五月初九日夏至以前為時無幾其西蕭家莊以下川字河等工計長三十七里每日約需夫萬人批築四十日方可完竣今臣擬於三月二十二日興工約至五月初一二日始得完工若不及時先行趕辦麥汛一至有水蓄佔斷難施

工應先撥動要工銀兩興工趕辦俟部覆領到帑銀之日再為接濟庶工程不致遲悞等語奉

硃批大學士鄂爾泰尚書訥親一併速議具奏欽此查永定河五工以下另開支河既據該總河備陳情形不致淤墊三汊河等處亦並無潰入運河之虞應無庸再議至挑河築隄等項工程前經大學士九卿會議具照河臣顧琮所籌事宜奏准在案今顧琮將各工估計奏請趕辦期於汛前完竣而以

下游開挑川字河為尤關緊要據稱西蕭家莊以下雖有河水通行之路只可容納春水不能宣洩伏秋汎漲一有梗阻則上游難保無虞等語查自水道改由鄭家樓勢雖不順而分洩路多地形趨下四五兩年隄工俱保穩固前亦據該總河奏明在案目今雖漸有淤墊形勢稍改量亦不致僅容春水所議開挑川字等河乃向來永定河所未經施行者在該總河欵籌久遠之計故不惜勞費為

之但此時正當農忙之際所需夫役衆多且今節氣較早欲於汛前趕辦完妥亦恐勢有不能或工程未完而汛水驟至尤為可慮臣等愚見應祇就現在河身酌量疏濬俾足宣通汛漲俟今年伏秋俱報平穩之後再行詳酌辦理庶為妥便又據奏南岸頭工高嶺應築聯絡月隄一道長八百餘丈又南岸二工北蔡舊有月隄應行加幫並接築隔隄以備放淤又北岸二工趙村渡口應加築月隄

一道長四百餘丈又北岸求賢莊至胡林莊應加築月隄一道長一千二百餘丈又洞子門以下接築陽淀坦坡埝至青光計長八里俱應急修以資保障等語查應築重隄如因縷隄卑薄應即照歲修例將縷堤加培高厚不必另議添築其洞子門以下舊無隔淀坡埝亦可從緩辦理至稱曹家務至永容應加築遙隄一道查曹家務建有減水壩數里之內又有郭家務減水壩使壩身高下合度

自可資以減洩暴漲此處遙隄及路疇村迤東越隄又葛漁城龐家莊等處各挑引河一道等工以現在清河渾河形勢觀之俱可於秋汛後再為酌辦至于母河槽等工程在該總河乃為永免河身復淤起見亦恐趕辦未能齊全轉致草率無益應令該總河再為相度將河唇淤高處所酌加挑挖以免梗滯不必普行開挑以上工程除應暫行停止各工外其有關緊要如疏濬下口開挑河唇及

加倍隄岸等工惟令伏秋汎漲不致有下壅上決
之虞詳審現在情形悉照歲修之例酌議妥辦仍
將應行趕辦各工覆加核估分晰奏

聞辦理可也謹

奏奉

硃批依議速行欽此

直隸河道總督顧琮查永定河從前自盧溝橋以
下原無隄岸溜走成河淤停為地京南霸北涿東

武西皆其故道數百里之內任其游蕩遷折水性
湍悍伏秋大汛當其沖者田廬被淹民苦水患是
以康熙三十七年間

聖祖仁皇帝命自盧溝橋以下挑河築隄若從前渾水不
為民患自無庸糜費帑金另為開河築隄也今
金門閘壩外固南霸北良東永西地方百里較之
從前地面僅四分之一勝劣大淀久經淤成平陸
是游蕩之地狹於前而容水之淀小於前伏秋汛

漲四漫橫流水必深於從前此今昔之異也況生
齒倍於當年而人烟稠於昔日未便村村遷徙豈
能處處防護水性無定實有所難現在試看於凌
汛水已盈滿兩岸漫出若經伏秋大汛水勢倍增
則漫淹更甚有必然者查乾隆二年內汛水異漲
從北岸張客漫口洩出十分之七南岸金門關迤
上鐵狗漫口洩出十分之三人民田舍即淹沒難
堪查異漲之水雖倍尋常大汛其十分之三不過

等於平常汎水十分之六今引全河南注倘遇伏
秋盛漲較之從前鐵狗漫出水勢分數必然更大
况永定河之所以為患者總以渾水淤淀下游不
能暢達之故今雖名為改復故道實係導水於兩
淀之間若引河淺狹則有漫淹之患寬深則有淤
淀之虞竊思先王因害而修利不可修利以倡害
改復故道一語雖名為上策實有害於民生萬不
可行夫渾水若無隄而有岸雖有漫溢不致奪河

如漳河是也今永定河改歸故道無隄無岸一遇
伏秋大汛溢出之水四漫橫流奔騰就下一往莫
禦必然奪溜當其冲者必致為害此其可慮者也
今若將河身挑挖寬深導之盡入玉帶河雖清流
可以刷渾不致淤塞但下游終歸於淀一入止水
積漸必淤東淀既淤則勢如抗吭將來玉帶河亦
必因之而淤並西淀白溝諸水無路達津深為可
慮况伏秋大汛河水漲發出槽四漫水性就下溜

之所趨得勢奔流則必有刷一河湍行奪溜其引
河下口亦必立見其淤卽如雍正十一年麥汛天
開引河於三角淀之南寬七八十丈深一丈二三
尺不等迨伏汛河水出槽漫過三角淀北另刷一
河隨將天開引河一夜淤成平陸今將引河挑挖
斷不能如天開引河之寬深則將來引河之不免
於淤墊此其明驗也查玉帶河乃西淀之尾閘衆
水之總匯寬深通暢由東淀入大清河也大清河

乃東淀之尾閘兼之西淀諸水總匯寬深通暢達
津歸海而東淀之有大清河即如西淀之有玉帶
河也查新河金門閘以外固新霸一帶地勢窪下
並無河岸而舊河南自郭家務老隄接築隔淀坦
坡埝四十四里至洞子門北有半截河以下隄外
遠築隄埝四十七里至龐家莊此兩埝相距三十
餘里與其挑無岸之水不如挑有埝之河與其導
水入玉帶河歸淀不如導水入大清河歸津此其

顯而易見之理蓋河務議者多而知者少言之易而行之難要在因時制宜審今昔之形勢權事理之重輕使小民不致受水之害亦無淤淀之虞乃為經久之良圖查永定河自築隄開河導水入淀以來原以永衛民生轉致淤淀為患蓋因濁流入止水之故也欽惟

世宗憲皇帝諭旨令渾河別由一道入河毋使入淀可謂探本清源一言而舉其要凡治渾河毋能違越者

也今欲為永定河籌萬全之策首當令其別由一
道查現在之舊河即別由一道也再查潘季馴河
議辨惑云河流渾濁淤沙相半流行既久迤邐淤
澱久而決者勢也為今之策止宜寬立隄防約攔
水勢使不大段湧流耳此即馴近築遙隄之意也
今永定河河唇高於隄外之地與黃河相似應仿
潘季馴治黃河築遙隄勻沙之法於上游兩岸縷
隄之外增築遙隄與舊有遙月隄連絡相接既可

以為重層保障又可放淤勻沙其所築遙月隄必高於縷隄數尺以防異漲於麥伏二汛仿南運河放淤之法酌量放淤雖兩隄之間不能如南運河淤與隄頂相平亦必高於河唇倘遇伏秋異漲漫過縷隄而月隄之內地既高於河唇隄又高於縷隄則漫溢之水必盈科而返此理勢之所必然者即遇異漲既有遙隄防護又有現在減水各壩足資分洩無慮漫決再查永定河之病在於下游河

唇淤高水難速下應將五工以下之河唇挑挖如
舊其挑河之土加培兩隄仍將半截河之下大隄
挑斷數百丈循照原議於此另挑河道以作尾閘
仿前總河靳輔之法挑川字河至韓家樹之東入
大清河即以挑河之土作拉沙洩潮埝而下游分
洩既速則五工以下亦免復淤之病矣再查京南
一帶漑水槩由龍鳳等河合流入大清河清渾合
流水勢浩大難以容納應自葛漁城北埝之外起

至鳳河之龐家莊止另挑一河引雅拔龍河之水
入鳳河之北來瀝水歸宿有地即以挑河之土培
築北埝於鳳河下游之龐家莊起另挑一河至西
沽之西入大清河使其分流以減水勢並將郭家
務之下大隄挑斷百餘丈導水於隅淀坦坡埝之
北入引河以資分洩再於鄭家樓疏濬支河一道
於葛漁城東與北股合流蓋潭河上游與中段兩
河溜不並行若下口則支河愈多分洩愈暢查永

定河不難治於平時所難在於暴漲今既有減水石草各壩以減水勢又有鑿遙隄以資捍禦下口通暢上游無阻河唇不致淤高如此經理既可治其暴漲又無淤淀之患庶為萬全之計也

乾隆六年四月初三日大學士鄂爾泰戶部尚書訥親工部等會議得直隸河道總督顧琮覆奏河工疏挑情形一摺該臣等查前議永定河添辦各工程乃欲為經久之圖而汛前趕辦為期已迫是

以令其暫行停止惟將有關緊要如疏下口開挑
河唇及加培隄岸等工詳審現在情形悉照歲修
之例酌議妥辦俾伏秋汛漲不致有下壅上決之
虞仍將應行趕辦各工覆加核估分晰奏

聞等因今據顧琮奏稱動用疏濬下口歲修銀兩將鄭
家樓至魚壩口歸鳳河一帶就現在淤墊梗阻過
高之處相度開濬水有通路俟伏秋汛後再察情
形辦理又將五工以下河溜逼近埽鑲隄根如曹

家務何麻子營半截河四聖口武家莊安瀾城等處應切挑河唇截挑淤嘴俱在於原奏麥汛前挑挖八段內分別通融趕辦又加培縷隄必須細加丈量核除舊土造冊會題往返需時更難趕辦惟嚴檄該道廳遵照上年之例多備料物俟伏秋汛臨加意防守竭力搶護又雅拔河下游之葛漁村村南一帶已經淤高不惟瀝水無路兼恐渾水漲發必致倒漾業經閉塞今擬於葛漁城北埵之外

挑河槽一道引雅拔河下游之水入龍河會流計
長一千八百餘丈面寬二丈底寬一丈深三尺庶
雅拔河之水得有去路但龍河雅拔河兩河會流
難以容納再於北埵之外龍河之東挑洩水溝一
道長七千餘丈面寬一丈斜深二尺導龍河下游
不能容納之水至龐家莊會入鳳河庶滙水有所
分洩即將所挖之土運培北埵加礮築實共需銀
一千六百餘兩即在於存剩歲修疏濬銀兩內動

用辦理以上各工俱照歲修之例估報等語查新
添各工即經停止覆估各工均關緊要俱應照所
奏辦理惟是顧琮奏內又稱伏秋汛臨惟有仰仗
聖主洪福河伯効靈得以宣通穩固實非臣所能保其
不致下壅上決之虞者等語在顧琮以鄭家樓以
下無一定河路四五兩年大汛之後復有東淤西
軼兼之改河以後斷溜沙停下游漸次淤墊迥非
上年形勢其八工淤墊更甚必須批川字河子母

等河作岡岐岸始能容洩暴漲顧琮目擊情形兼
籌久遠雖非漫為此議但永定下游久淤下口屢
改從前亦並未有作川字河等工而歲修之法亦
不出疏濬加培兩策若因下游於改河之後更加
淤墊不能宣洩汎漲自應酌加開濬深通亦不可
拘歲修疏濬之常例致有貽悞至謂不作川字河
岡岐岸即不能保無上壅下決之虞亦殊非確論
又顧琮另摺內奏稱下游一帶逐漸淤平將來伏

秋汛漲水性就下直趨北埝以五六尺高之埝豈能捍禦浩瀾之渾流勢必穿埝而出漫淹田廬為害非細等語顧琮既如此陳奏豈可因前議新工停止不為變通料理惟稱悉照部議疏挑即可了事且河道歲修工程增減原無定則尤未可察以歲修常例拘泥推諉河道民生所關匪細應令顧琮就現在情形速為妥酌查辦必伏秋大汛宣通有路隄障無虞如有應行續為估辦之處仍據實

奏

聞恭候

聖訓遵行可也奉

硃批依議速行顧琮茫無定見左遷右移實非實心任
事之誼著嚴飭行欽此

乾隆六年四月十七日工部為永定歸復故道事
該臣等查直隸總督孫嘉淦等疏稱永定河金門
開閘隄放水歸復故道一案經臣奏明奉

旨俞允欽遵會同河臣顧琮督令道廳開河放水並應
行拆隄挑挖引河以及應挑沙嘴建築草壩培築
戽隄等工共用過土方工料銀四千二百六十四
兩一分八釐零至此案動用銀兩暫於預備要工
銀內動用應請於司庫地糧銀內撥動歸款理合
具題核銷等因金門閘石壩之上數十丈係河流
頂冲之所於此處開一土壩掘展寬深則全河之
水可以順流暢達等因具奏經大學士九卿覆准

令其詳慎辦理在案今據該督將開河放水並挑
河築壩等工用過銀兩造冊題銷臣部查造送冊
開需用土方工料等項價值以及丈尺做法均與
核銷之例相符應將用過銀四千二百六十四兩
一分八釐零准其開銷借動預備要工銀兩應令
該督在於司庫地糧銀內照數動撥還項仍將動
撥銀款數目造報戶部查核可也奉

旨依議欽此

乾隆六年六月十三日直隸總河顧琮為

奏明事竊查永定河水性湍悍最稱難治前經大學士鄂爾泰等將應挑應浚河道並應行幫築隄工一切事宜具奏奉

旨大學士九卿議奏欽此所有前項修濬隄河各工應聽候議覆奉

旨之日欽遵辦理但臣於金門閘以上隄口合龍之後隨將上下各工逐細查勘相度險易再三籌畫有

最關緊要月隄二處應急修築以資防守查北岸頭工北張客向係頂冲險工自乾隆二年漫溢開口之後更加險要現今雖有埽鑲防護但該處隄工土性純沙又無遙隄難資保護應於隄外築月隄一道以為保護計長五百丈約估需銀四千四百餘兩又南岸五工曹家務係頂冲大溜臣於乾隆三年七月內在該工督率搶險目擊情形實係通河最險之工今河身漸加淤墊工程較前更險

此外亦無遙隄應築月隄一道以資保護計長四百四十餘丈約估需銀六千二百餘兩以上二處月隄均關緊要應急修築若俟議復之後與別項隄河工程一同估修既恐大工難以一時並舉又恐麥汎以前為時無幾修築稍遲有悞汎期是以臣一面撥動要工銀兩上緊趕築務於麥汎以前完竣以資防守除修築月隄工價銀兩容臣另行確實題估請 帝還項外所有動撥銀兩趕築月

隄緣由理合恭摺奏明伏乞

皇上睿鑒謹

奏奉

硃批知道了欽此

乾隆六年九月二十五日工部為察核具

奏事該臣等查得原任直隸河道總督顧琮疏稱永定河南岸二工金門閘新河口以下舊河身應挑川字河工程自川字中河起共四段長一千二十

丈又左支河長二百三十丈右支河長二百七丈
實用銀五千五百八十六兩四錢六分四釐八毫
當經委員分段承挑尅期完竣理合造冊題銷再
查該工所需銀兩係借撥天津道庫貯要工銀兩
自應另文給咨赴部請領還項合行聲明等因前
奉 旨 金門開新河口以下至北蔡舊河身淤平一
千餘丈及左右支河各長二百餘丈先經原任直
隸河道總督顧琮擬挑川字河導水趨注以資暢

達等因於本年二月內奏明在案內據該原任總
河顧琮將用過銀兩造冊題請臣部查冊開所需
土方工價按照長丈核算均與准銷之例相符應
將用過銀兩五千五百八十六兩四錢六分四釐
八毫准其開銷其所需借撥天津道庫貯撥工銀
兩應令該督給咨委員赴部請領還項可也奉

旨依議欽此

乾隆八年二月十五日工部等會議得吏部尚書

署理直隸總督史貽直奏稱臣自保定起身至固
安沿河南北兩岸將隄埝閘壩各工程及三角淀
等處下口情形詳加查勘所有南岸之金門閘石
壩一座、長安城曹家務郭家務雙營草壩四座、北
岸之求賢村胡林店小惠家莊半截河草壩四座、
共計石草壩九處、皆以備減洩泛漲之水、自督臣
高斌奏請改建添建之後、上年各壩過水情形俱
甚平穩、已屬試行有效、應再於南北兩岸相度善

地添建草壩數座使伏秋之汎漲多洩一分則下注之泥沙亦即勻減一分河身惟行正溜餘水悉令旁溢即係從前故道任其散漫不加迫束之意而壩外皆有自然之引河重繞之隄障於民田廬舍全無損礙尤屬萬全今酌於南岸六工之清涼寺張仙務二處添建三合土滾壩二座壩身再較雙營等壩尺寸稍低金門各寬十六丈兩壩共寬三十二丈合之郭家務雙營減下之水俱以郭家

務舊河身為引河又北岸下七工之五道口八工
之孫家坨村南二處可以添建三合土滾壩二座
但查孫家坨村南河溜南折沁有頂冲大灣經督
臣高斌開挖引河里許引水東注今應添滾壩處
所當引河河岸之旁一百三十餘丈但引河究屬
改溜之初恐或一時漲作湧遏近壩為患應暫停
建設今年伏秋汛過引河沁刷寬暢與正河相等
再行添建始為妥協今酌議於五道口添建草壩

一座壩身再較惠家莊壩尺寸稍低金門應照求
賢村等壩舊式寬二十丈再此處隄外地勢甚低
壩門出水灰土箆箕須較常式加長數丈今有坡
下之勢則水過可無冲塌之患以上應添南北兩
岸滾壩三座共約估需銀一萬九千五百餘兩應
請在於天津道庫內先行動支要工銀兩令永定
河道六格即飭該廳員等速行採辦料物該道督
率上緊辦理並令清河道方觀承會同相視稽查

務令汛前早竣俾草土俱得乾結堅固其工料確
估細數另行造冊送部查核再查三角淀新河下
口東北趨又光葉淀等處自刷有河身一道約長
七里許過此則散漫出槽泥溜淀內水由鳳河以
入大清河觀其趨淀之路實為全河尾閘雖就下
之勢甚順但河身或虞淺阻轉瞬凌汛即至臣已
面諭永定河道六格俟冰融時不拘汛前汛後隨
時疏濬務須寬順通暢毋令稍有阻滯以致正河

下口復有改移淤墊之患至於下口河淀一切機宜均關緊要臣向來既未身歷情形現在又普漫昏冰難以查勘實不敢輕為置議容俟督臣高斌回任之後再為接辦俾其詳勘熟籌奏請

聖訓指示辦理庶於河務長久之策可收實效而夏汛為期尚早於現辦之事亦不致有悞等因具奏前來查先於乾隆六年十一月內據直隸總督高斌勘議永定河河工事宜奏請將南岸金門閘石滾

壩中抽二十丈落下一尺五寸又於雙營胡林店
小惠家莊各添建三合土滾壩一座壩身俱較石
壩減落尺寸稍低並郭家務舊有草壩一律修築
如式以備滾洩出槽汎漲之水其長安城曹家務
求賢村半截河四壩以備滾洩陡發盛漲之水則
渾流直歸清溜而無止水之隔等因經臣等議覆
准行在案今該署督史貽直詳細查勘上年各壩
過水情形俱甚平穩已屬試行有效奏請在於南

岸六工之清涼寺張仙務二處添設三合土滾壩
二座壩身再較雙營等壩尺寸稍低金門各寬十
六丈兩壩共寬三十二丈合之郭家務雙營減下
之水俱以郭家務舊河身為引河又北岸下七工
之五道口添建草壩一座壩身再較惠家莊壩尺
寸稍低金門應照求賢等壩舊式寬二十丈再此
處隄外地勢甚低壩門出水灰土簸箕須較常式
加長數丈今有坡下之勢則水過可無沖塌之患

等語查永定一河擁扶泥沙每遇汛漲易致壅決
是必疏消有致減洩迅速始足以防潰漫先經直
隸總督高斌將金門閘等石草各壩酌量裁改添
築逐漸抽低分別減洩汛漲原因壩身太高裁改
合度以利疏消之意該署督查勘過水情形俱屬
平穩則是行之已有成效今請於南北兩岸添建
滾壩三座較從前各壩身尺寸稍低與高斌原議
之意相同自應照所奏准其添建滾壩以備汛漲

宣洩之用其所需工料銀兩應令該督在於天津道預備要工銀內動支給發及時趨辦務於汛前早竣仍將應需工料銀兩細數確估造冊送部查核至北岸八工之孫家坨村南可添滾壩一座該署督既稱適當新批引河河岸之旁恐或一時漲作湧遏近壩為患應俟今年伏秋汛過引河汕刷寬暢再行添建等語應令該督俟伏秋汛過酌量情形再將應否添建滾壩之處

奏明請

旨遵行再三角淀新河下口河道係汎水歸宿之要道
轉瞬凌汎即至應令加謹防護俟冰融即及時疏
濬深通無致淤墊為患至下口河淀一切機宜該
署督雖稱現在普漫皆冰難以查勘容俟高斌回
任後再為接辦等語查下口河淀機宜關係全河
尾閘最為緊要不日冰融汎至自應即速詳勘辦
理相應仍令該督親行確勘飭道廳各員詳籌熟

計妥協辦理俟高斌回任後再為接辦可也奉

旨依議欽此

乾隆八年四月初七日大學士鄂爾泰會同工部
為查辦永定河下口等事宜仰祈

睿鑒事該臣等會議得吏部尚書署理直隸總督印務
史貽直奏稱保定由霸州赴三角淀一帶查勘
新河下口歸入葉淀之路現在水口汕刷寬暢六
工以下河身亦俱深寬趨下之勢甚為順利其下

口北抵又光又自又光至二光河槽兩段河身俱在淀內地勢普面低窪惟應將淺溢處稍加開濬以容正溜足資暢達無容過為寬深新河之東為青光鳳河下口葉淀沙淀之水皆以大清河為歸宿而上游南北兩岸又有新舊二滾壩可以宣漲散淤就目前情形而論全局可稱妥順其餘各處尚有須經理者如新河南岸所堆費土應俱派令夯築堅實畧加鑲墊以防渾水東南泛入洞子門

之路又三河頭迤東大清河北岸一帶地勢甚低
上連紫淀遇北風稍大恐渾水南駛不免泥沙攔
入清河應於河頭村西起至青光西止築埝一道
約長八百餘丈高五尺底寬四丈頂寬一丈以內
今成坦坡之形以資捍禦即交隔淀埝之該汛官
一併管理於汎漲時勤加防守務使渾水不致下
注為患其董家河三道河等河口以次量加疏濬
俾清水得以暢行則浮沙日漸刷去可無餘慮再

查半截河隄以下自新莊至東蕭家莊北埝一道長四十餘里埝外為固安永清武清東安各縣滙水滙歸之地每遇雨水稍多輒成巨浸滄害民田埝下舊有引河導注積水入於鳳河消納近經堙塞僅存河形應將穆家口以下二十餘里重為開批約寬一丈五六尺隨地勢之高下以為淺深俾一律通順直達鳳河則瀝水之患可除臣思此項工程原為民田除患若文武永東三縣勸民修濬

固屬可行但值農忙之候全用民力不無苦累似應於永定河道庫節存歲修項內量撥銀六百兩以資工作飯食仍令該河道委員會同地方官勸諭妥協辦理即以挑河之土就近培築北埝督令河兵夯礮堅固更為一舉兩得此處因通天津大路往來車馬多由埝行走以致踐軋殘壞此次工竣之後應交東安縣主簿就近管理查禁毋許往來車馬仍由埝上行走其接北埝之半截河大隄

從前費帑數萬修築今無闕河路亦恐日漸殘廢殊覺可惜應交北岸汛員按照工段分管務將水溝鼠穴隨時修治完整又北埵外雅拔河龍河二道舊有涵洞通入淀內亦係消納武東以南瀝水嗣因河由鄭家樓北趨葛漁城旁近涵洞未便是以堵塞今河路改由又光以東相距已十餘里應仍照舊建設俾兩處涵洞與新批引河並資消洩為利益溥矣又鳳河之東順河小堤一道為北

運河保障最關緊要現多殘缺應加修補此隄向

係天津道承修應仍交該道查議辦理至五工舊

有曹家務草壩出水之地雖係荒減但距永清縣

治較近兼以五工土性虛鬆工料年久壩外宜有

攔束查離隄二三里外依稀有小埝可尋應交該

地方官會同河員查明起止勸用民力就築成埝

以資防護更屬萬全以上除應交地方官承辦各

工外其餘應疏應築並無另議新增之工已飭永

定河道六格即於每年疏濬下口項內動支通融
辦理如有不敷在於歷年節存歲修項下撥用照
例造報核銷毋庸另外請項合併聲明等因前來
查得先經直隸總督高斌奏請於三角淀舊路改
批成河藉天然積淤之隄岸挽鄭家樓北折之水
乘建瓚之勢直注大清水無緩散沙無停滯即
漲發出槽而正溜仍行地中庶於補偏救弊之中
有因勢利導之益且可免透淀穿運之虞等因臣

等因查永定渾流漲落靡常湍激無定不拘經由何路固難言一勞永逸之道然必須措置得宜始可收補救之益今以開通引河為尾閘正道又多建壩座分洩汎漲為目下補偏救弊之計但恐將來經汎之後水勢變遷難以預料而下口或有淤墊之情形則全河俱受其病關係匪輕應令該督隨時加意熟籌奏請

聖訓指示辦理於乾隆六年十二月內覆准在案今該

署曾由三角淀一帶查勘新河下口等處俱係深
通水有歸宿南北兩岸可以宣漲散淤全局已為
妥順應毋庸議惟是下口又光至二光河槽淺隘
以及董家河三道河等河口應行稍為開濬疏通
又新河南岸並鳳河以東隄埝殘缺應行畧加培
補鑲墊之處應令該督飭令該道相機辦理至奏
稱三河頭迤東大清河北岸一帶地勢甚低北風
稍大渾水南駛不免攔入清河應於河頭村西起

至青光西止築埝一道約長八百餘丈令成坦坡之形俾渾水不致下注為患等語應如所請准其於河頭村西起至青光西止築埝一道交與該管汛員加緊防守以資捍禦又奏稱半截河隄以下自新莊至東蕭家莊北埝外為固安永清武清東安各縣滙水滙歸之地舊有引河導注積水入於鳳河消納近經堙塞應將穆家口以下二十餘里重為開挑一律通順直達鳳河則滙水之患可除

此項工程若勸民修濬固屬可行但時值農忙不無苦累似應於永定道庫節存歲修項內量撥銀六百兩以資工作飯食即以挑河之土就近培築北檢督令河兵夯碾堅固工竣之後應交東安縣主簿就近管理毋許往來車馬仍由檢上行走等語查疏濬前項引河原為民田起見本應民間自為經理但時值農忙之候仍用民力未免重勞亦應如所請准其在於永定道庫節存歲修項下撥

銀六百兩以資工作飯食即以挑河之土就近培築北埝督令河兵夯碾堅固飭令該管汛員查禁往來車馬毋許仍由埝上行走又奏稱半截河大隄今雖無闕河路亦恐日漸殘廢應即交北岸汛員按照工段分管務將水溝鼠穴隨時修治完整又雅拔河龍河二道舊有涵洞嗣因河由鄭家樓北趨葛漁城旁近涵洞是以堵閉今河路改由又先以東相距已十餘里應仍照舊建設至曹家務

舊有草壩出水之地距永清縣治較近壩外宜有
捆束查離隄二三里外依稀有小埝可尋應交地
方官會同河員查明起止勸民就築成埝以資防
護等語均應如所請半截河大隄如有鼠穴水溝
殘缺處所令該管汛員不時巡查修治完整其雅
拔河龍河舊有涵洞仍令開通以資宣洩至曹家
務草壩以外應修小埝一道既稱勸用民力應毋
庸議相應行令該督將所有應行修築疏濬各工

即速動支道庫銀兩上緊趨辦仍飭令確估造冊
送部查核俟工完之日照例核實造具清冊具題
核銷可也奉

旨依議速行欽此

乾隆八年十一月二十七日大學士鄂爾泰尚書
訥親史貽直巡撫阿里衮工部會議得直隸總督
高斌奏稱桑乾河為永定上游發源於山西馬邑
之洪濤山經山西之應州大同陽高天鎮直隸之

西寧保安等州邑至宛平之石景山計長八百七十餘里保安州境內桑乾與渾河並舊有開渠六道繞渠粳稻資其灌溉民多富饒康熙十八年大同西寧等縣居民以桑乾所經各村墟地面寬墾平行可仿照保安六渠之制於河南北岸各開大渠一道支引其水營治稻田又足為無窮之利曾議各捐渠身地畝合力開挑因年歛力薄而止至今尚有渠口舊跡乾隆六年二月向該處士民又

曾呈請借帑興工渠成田熟按畝認還因事闕
兩者未及商同妥議上年十二月內署督臣史貽
直遣員前往查勘地勢諮訪輿情事屬可行移交
到臣臣念興修水利既與地方有裨而因以減洩
永定水勢亦與河工有益隨備文移會山西撫臣
委冀寧道盛典會同直隸口北道王芥園帶同河
員逐細看明測量桑乾河北岸自山西大同縣屬
之西堰頭村黑石嘴起東至直隸西寧屬縣之辛

其村止可開大渠一道計長四十六里南岸自大
同縣屬之冊田村起東至西寧縣之揣骨墘止可
開大渠一道計長五十八里渠尾俱仍歸入桑乾
正河兩渠成後約可灌田八百餘頃臨渠各村荒
域之地悉可化為腴壤實有益於民田全無礙於
地方又將兩岸相較北岸地勢衍順施工為易灌
田亦多似應先開北岸俟有成效再行估批南岸
更為妥協今估計北岸渠長四十六里六分在山

西境內二十五里六分零在直隸境內二十一里約估需銀六千二百餘兩又渠口應開石工約估需銀一千六百餘兩又河灘自渠口至水邊應建迎溜亂石根壩約估需運砌夫工銀一千一百餘兩通共約估需銀八千九百餘兩又據山西冀寧道等會詳此項工程事屬兩省地連四縣但各該縣均非河員疏濬事宜非所素習不便交辦應請直督專委河員領帑承辦令各該地方官襄助

庶責成專而報銷亦易等語臣查原委之蒞運通判吳汝義主簿徐文龍二員熟諳工程周知形勢應即交令承辦仍令口北道王芥園就近督率稽核至開渠築壩應需銀兩查清河道庫內舊存有營田工本銀五萬餘兩係從前借給民間營田歸還之項仰懇

聖恩准於此項銀內動支俟營田成熟後按畝均攤還官其如何分年分省派還歸款及新營成熟地畝

按則陞科之處容臣會同山西撫臣詳議同估勘
各工應需細數一併造冊題報即於來年春融後
興工如北岸試行有效再將南岸勘估以次舉行
其在山西應州境內之渾源河發源渾源州滙歸
桑乾據實委員等查勘亦可開渠營治稻田南北
兩岸形勢相等應俟兩岸渠成之後著有成效再
聽山西撫臣查明辦理再永定每當漲發之時倍
稱險易皆由上游崇山夾束扶建飢之勢坐湧直

注至石景山始就平地而湍流所向自金門關以
上無一定河身蓋離山未遠其氣又急也今查上
游桑乾河由西寧縣之石閘村入山所經宣化境
內之黑龍灣懷來境內之和合堡宛平境內之沿
河口三處皆兩山夾持中經二十五六丈其全河
之水一線東趨舍此更無別路乃天成閘壩關鍵
之地若於此三處山口就取巨石錯落堆疊彷彿
竹絡壩之意作為玲瓏水壩以勒其洶暴之勢則

下游之患可以稍減委員親至三處山口逐加詳勘和合堡又為衆河匯流之處應先於此處建壩係水中修建鑿取本山石塊約估需夫工價銀二千餘兩此項銀兩應請一併在清河道庫營田工本項下動支報銷統俟部覆到日一併確估造報於來年春融時興工俟試行有效再將黑龍灣沿河口二處酌照增修伴層層截頓以殺其勢更為妥便以上開渠建壩一事實於河道民生均有裨

益等因具奏前來查乾隆二年七月十七日內閣
奉

上諭自古致治以養民為本而養民之道必使興利防
患水旱無虞方能使益藏充裕緩急可資是以川澤
陂塘溝渠隄岸凡有關於農事預籌畫於平時斯蓄
洩得宜潦則有疏導之方旱則資灌溉之利非可護
之天時豐歉之適然而臨時賑恤為可塞責也朕御
極以來宵旰憂勤惟小民之依是詔凡前前後後諭旨

諄復再三但化導自在有司而督率則口大吏即如直隸今年夏初少雨深以暎旱為憂及連雨數日尚不甚大而永定河隨有漲溢之患決口至四十餘處低窪之地多被水淹雖因山水驟發然水性就下其經行之地自有定所設預為溝渠以洩之為塘堰以蓄之自可以分殺水勢不致滙為洪流衝突漫衍如此之甚是皆平日不能預先籌畫所致也該督撫有司務體朕痾瘵乃身之意刻刻以民生利賴為先圖

一切水旱事宜悉心講究應行修舉者即行修舉或
勸導百姓自為經理如工程重大應動帑項者者即
行奏聞妥協辦理欽此經工部通行各該督撫欽遵
在案今直隸總督高斌奏稱查勘桑乾河為永定
河之上游發源於山西所經各處村莊地面平行
可於南北兩岸各開大渠一道支引灌溉營治稻
田約可灌田八百餘頃又將兩岸相較北岸地勢
衍順施工為易溉田亦多應先開北岸俟有成效

再行估批南岸估計開渠建壩等二十六約需銀八
千九百餘兩於清河道庫貯營田工本銀五萬餘
兩內動支俟營田成熟後按畝均攤還項等語臣
等伏思一切水利河道工程凡有關於國計民生
者自當即為經理以仰副我

皇上惠愛元元之至意查永定之上游為系乾河發源
於山西境內綿長數百里渾流湍急公議開渠道
既可以減洩永定水勢復可以灌溉民田於河道

民生均有裨益事屬當行應如該督所奏准其於
桑乾河南北兩岸各開渠一道以資灌溉先將北
岸渠工自山西大同縣屬之西堰頭村黑石嘴起
至直隸西寧縣之辛其村止飭委河員上緊批挖
仍令山西巡撫飭令各該地方官協理工完據實
報銷仍先將應需銀兩細數造報工部查核俟北
岸渠成著有成效再將南岸應開渠工據實估批
至用過銀兩應作何分年分省歸還原款以及新

營成熟地畝按則陞科之處仍令該撫等詳悉
妥議題報戶部查核至該督奏稱山西應州境內
之渾源河發源渾源州匯歸桑乾亦可開渠營治
稻田於南北兩岸形勢相等俟兩岸渠成之後著
有成效應聽山西撫臣查明辦理之處容俟臣阿
里衮到任之後逐一查明將該處情形可否開渠
營田之處據實具題再議又奏稱永定河上游桑
乾河由西寧縣之石閘村入山所經宣化境內之

黑龍灣懷來境內之和合堡宛平境內之沿河口
三處皆兩山夾峙全河之水東趨舍此更無別路
若於此三處山口就近取石堆置瓊瑰水壩以勒
其洶暴之勢則下游之患可以稍減再和合堡又
為衆河匯流之處應先於此處建壩約估銀二千
餘兩應請一併在營田工本項下動支報銷俟試
行有效再將黑龍灣沿河口二處酌估增修俾層
層截頓以殺其勢等語查永定河確係扶沙水勢

洶湧若於和合堡等處建築玲瓏石壩果能截緩
水勢措置得宜自可減奔騰直注之患但恐大水
之年下流層層攔築上游不無阻遏壅淤之虞應
令該督等酌度形勢詳慎辦理俟試行有效再將
黑龍灣沿河口二處酌估增修可也謹

奏奉

硃批依議即行欽此

永定河志卷十四